



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 2 Yangia anidakangma : Tir Yimym tiryimym@aolima tir yimym TAPAK 7

**CAA benoktsü Tripura
renemer: CM Manik Saha**

**Russia-i anüing ajanga Kharkiv
amak; nisung 5 asü**



VOL. XXI ISSUE NO. 217 (ADOK 217) DIMAPUR TENTONÜ (MONDAY) MONUPII (MAY) 20, 2024 ₹ 5.00

ENWO nung Eastern Sumi Totimi Hoho züingsemogo

Dimapur, May 19, 2024 (Agencies): Eastern Nagaland Women Organisation (ENWO) nung Eastern Sumi Totimi Hoho (ESTH) züingsemogo.

ENWO headquarters Longleng nung Longleng Town Baptist Church (LTBC) conference hall nung ESTH agizükba sentong ayongzüka agiogo.

"ESTH adenba ya kanga tongtipang lir aser iba ajanga Eastern Nagaland nung tetsür teloktem tsüingda tesentaktep akangshiba sayur. Iba ajanga amalitep aser teyaritep tajungba akümtsü aser Eastern Nagaland nung tetsürtem tashi itdaksüba aser renlokdaksüba nung

külemi yaritepa aotsü" ta ENWO-i ashi.

Tetsürtem longjemtsüla aser kati ka ajungkettsüla. Tetsürtem külemi inyakba ajanga temelenshi bener arutettsü anungji züingsem ajaki lanuputu atema role models asütsü ayongzüker, ta ENWO President Yingphe Konyak-i ashi.

Iba sentong nung ESTH aser Sumi Totimi Hoho nung lennirtemi jembi aser parnoki külem tajangzüktem aser külem alizüngtem indang lemsatepa liasü.

Mapang talangka nung ESTH-i ENWO nung züingsemtsü bilema aru aser tanü iba pungmangji asangsang nung atalokogo, ta parnokisa ashi.

Kaisa Rio-i MSSM nem tenüingsang agütsü



Dimapur, May 19, 2024 (TYO): Margaret Shishak School of Music (MSSM) ya kentenbaren dak sendakba sempet anepalutsü aser ajungkettsü nükjidong nung tenzük aser asen lima nung temelenshi aika bener arutetogo ta Nagaland Chief Minister Neiphiu Rio kinungtsü Kaisa Rio-i ashi.

Deobarnü MSSM küm 10 ajungba kentenba sentong nung jembidang Kaisa-i iba osang metetdaksü. Taküm ya Patkai Christian College tenzüker küm 50 abensaba hon jubilee küm lir.

"Music ajanga nisung ka taküm tajungba akümer aser tangar dak kanga kongshir. Kaketshirtemi meimchir tajung ka akümtsüba music shimteta tajungba akümtsü merangtsüla" ta lai ashi.

"Naga nung dak kentenmenüba sempet keta lir aser asenok tanur asüding nungi

church music ajanga asen takümtem nung temelenshi bentsür arur. MSSM ya maneni shisatsü tasen adokdaksü, sempet arangshidak aser asür Margaret Shishak indang senmang sayudak ka maneni asütsü imlar" ta Kaisa Rio-isa ashi.

Kümtem süia arudang Patkai Christian College ya lanur anitetba aser tarutsü lennirtem shisatsü angudak ka ama inyaka arur. Tayongzükba jenti ajuruogo aser takok-a aika nguogo saka item ajak madak college-i 'excellence and service' tenangzükba nung kanga tashi ita noktaka arur, ta laisa metetdaksü.

Kaisa-isa Patkai Christian College aser MSSM nem alizüngtem tongtetba atema tenüingsang agütsü aser maneni tajungba küma aotsü tamang akaba metetdaksü.

IMDH, Mokokchung ajanga metetdaksür

Dimapur, May 19, 2024 (TYO): May 18, 2024 aonung Dr. Imkongliba Memorial District Hospital (IMDH), Mokokchung nung kitsükkirong lendong ka atalokba sülen Medical Superintendent-i osang ka metetdaksüogo.

Tanga tetuyuba ka magütsü tashi IMDH nung Gynaecology Ward, ICU, SNCU aser Dialysis Unit shibanga atatsü saka tanga department ajak nung OPD akhi ama lapoktsü ta Medical Superintendent Dr. S. Marina Yaden-i ashi.

Kohima Police-i nisung tepseter 2 apu; Mezomia nungeri aitsür



Neizosetuo Kire

Khrietsonyü Whuorie

Kohima, May 19, 2024 (TYO): Honibar nikongdang North Police Station nung ken o ka benokba sülen Kohima police-i nisung tepseter ana puogo.

Gari traffic dak sendakba nung nisung anati tain ka dak teka sangshidang pa yirur mozü ki nung anepaludar ta Kohima police tsüingdang mezüing ken o ka benok.

Iba nisung ya Kezhalelie Lawrence ta jangjaogo aser tia maka pa süadok. Iba dak sendakba nung North Police Station nung ken o ka benok ta Kohima Police PRO-i ashi.

Police-i iba ken o dak sendakba nung pua aliba nisung ana ya Neizosetuo Kire (24) aser Khrietsonyü Whuorie (25) ta jangjaogo.

Lanur anati iba mapa inyakba atema temulung raksar aser mepelar ta Mezomia Mechü

Kehou (Mezomia Citizens Forum)-i metetdaksüogo.

"May 18 nikongdang 4:40 ako meta Phoolbari Bus/Taxi stand nung K Lawrence Miasalhou dak teka sangshi" ta MMK vice president Mhiesibeizo Vikhrie aser joint secretary Khrisakuolie Khawakhrie nati ashi.

Iba mapang Lawrence'er jabaso Thejavizo B Miasalhou dak-a teka sangshi. Pa nisung ana ket nungi tebu kümzüksü merandang züka merenshi ta MMK ketdangpurtemi ashi.

Iba mapang K Lawrence Miasalhou kanga mejungi yiru aser pa Oking Hospital, Kohima-i anir oa anepalu saka tanep 3:00 ako meta pa asü.

Lawrence ya MMK President teinyakdak liasü aser paisa PA to Deputy Commissioner, Kohima inyaka liasü. Lawrence ya ochishir ka liasü aser pa taküm

samatsüba ya kodanga magizüksü ta MMK-i metetdaksüogo.

Lanur anati tain ka dak iba ama mapa tamajung inyakba ya aitsür aser ozüing amertemi ozüing tapet kübok aibelenertem merenshitsü ayongzüker ta MMK-isa ashi.

Kija/telok shingia aibelener ana bail nung agizüksü memelatsüla. Mezomia sensotem rongnung lennir tajung ka asüba atema mangyimer aser tai maketba tanüla anisüngzük angutsü asoshi sarasademtsür ta MMK-isa metetdaksü.

WAYO-i tanü public rally ayonger

Külen, Western Angami Youth Organisation (WAYO)-ia Kezhalelie Lawrence Miasalhou, PA to Deputy Commissioner, Kohima tepsetba anema Hombarnü public rally ka ayongzükogo.

Kohima village nunger Neizosetuo Kire aser Khrietsonyü Whuorie nati Miasalhou zükset ta WAYO-i ashi.

Western Angami nunger ajaki Hombarnep 10:00 ako nung Paramedical junction nungi public rally nung adentsü mepishir. Iba tesem nungi Deputy Commissioner, Kohima office tashi oa memorandum ka agütsütsü ta WAYO-isa metetdaksü.

Sumi aser Chakhesang nunger Joint Declaration nung sign sütepogo



May 18, 2024 nü Chozuba yimtsüing nung Sumi aser Chakhesang nunger tsüingda Joint Declaration agidak adenertem agiba noksa angur.

Dimapur, May 19, 2024 (Agencies): Sumi aser Chakhesang nunger lennirtem May 18, 2024 nü Chozuba yimtsüing nung adenshir Joint Declaration ka nung sign sütepogo.

Iba Joint Declaration ya kin ana tsüingda putepa alitsü, kati ka akhümtsüteptsü aser angatetteptsü nükjidong yur agiogo.

Iba külem sangdong nung Sumi aser Chakhesang nunger tsüingda tesentaktep akangshitsü aser nüngdakba mapang yariteptsü onük dena lir.

September 5, 2023 nü

Chozuba Town nung tatalokba ka ajanga Sumi aser Chakhesang nunger tsüingda mangatettep adokba amadoktsü atema parnok tsüingda bangjemtep.

Iba dak sendakba nung Chozuba Range Public Organisation-i Sumi-Chakhesang Brotherhood nungi pilaba sangdong agütsüba meyipa agiogo.

Sumi aser Chakhesang nunger tsüingda kati ka akhümtsübu agütsüteptsü aser mapang shia ajurutepa tebilemstü onüktem lemsateptsü nangzüktepogo.

Kin ana tsüingda mangatettep

kar danga adokra kin ana nungi kasa züingsemtem dena joint committee ka tentettsü aser ken o angatetteptsü atema parnokisa tenangzükba agiogo.

Sumi aser Chakhesang lennirtemisa pei pei züingsemtem dang social media nung mepetmesü adoktsüsa osang meprokshitsü atema osang sangdongtsü mulungtepogo.

Iba Joint Declaration nung temelenshi kar dang adokra Sumi aser Chakhesang nunger teshimtet nübotemi tezüluba nung ayutsüla aser sign asütsü ta parnokisa lemtet.

CAA benoktsü Tripura renemer: CM Manik Saha



Manik Saha

Agartala, Monupii/May 19 (Agencies): Citizenship amendment act (CAA) benoktsü atema Tripura nung BJP sorkar renemdar, ta chief minister Manik Saha-i Hokolbarnü metetdaksü.

Tanga political party temi anemba mapang ka nung tang iba telemtetba agiogo. Iba ozüing tasenba ajanga Tripura nung lokti balala tsüingda mangatettep adoktsü akok ta political party tem yagi tsübuva bilemer.

Mosque ka nung azü tenlaba camp ka nung shilem agiba mapa osangbenertem den sensaksem dang Shah-i, Centre nungi tetuyuba agütsüba sülen state nung CAA benoktsü atema Tripura sorkar renemdar, ta ashi.

March 11 nü Centre-i, citizenship amendment rules 2024 metetdaksüogo, aser iba ajanga CAA benoktsü atema lenmang sadema lapoktsüogo. Iba ozüing yagi Hindu, Sikh, Jain, Buddhist, Parsi aser Khrista yimsü dak amangertem shirnok Bangladesh, Pakistan, aser Afghanistan nungi 2014 küm

December 31 masü dang India-i arua lir, parnok nem lisopur jenjang agütsütsü.

Ministry of home affairs (MHA) tetuyuba dak ajemdaker CAA kübok lisopur jenjang agütsütsü atema Tripura sorkari tawa Director of Census Operations mendenbuba sür züingsem trok agi kümtetba state-level empowered committee ka tentettsüogo.

Tripura nung tribal autonomous body, Tripura Tribal Areas Autonomous District Council (TTAADC) yagi state asemsü nung anabo achaayanger, kong nütsünyongsük 12,16,000 lir aser shilem 84 bo tribal tem lir.

Opposition CPI-M aser Congress na den Tripura nung BJP den longjemer aliba party tasenba Tipra Motha Party (TMP)-i CAA ya anema arudar.

TMP ngutetsang Pradyot Bikram Manikya Debbarma-i, CAA benokba ajanga ozüing alema pei tenüing züingoksema lisopur jenjang angutsü asoshi maongka agütsütsü ana nung

lir ta tekümdangtsü metetdaksüogo.

"Onok BJP den longjemer lir, saka ozü party principles aser policy tem tejangja lir. Onoki Northeast state kicha nunga demographic temelenshi madaokdatsüner, kechiyong lisopurtem nütsünyongsük ishika dang lir. Inyakyim tapet ka mebenokra nisung aikati ozüing alema lisopur jenjang akhangtsü," ta Debbarma-i osangbenertem dang ashi.

Opposition lenir aser CPI-M state secretary Jitendra Choudhury-i, par party-i CAA ya mapa talang ka nungi anema arudar, ta ashiba den pai iba act anema Supreme Court nung writ petition ka benokogo, ta ashi.

Choudhury-isa, CAA benokba ajanga Northeast ajunga dak kongshitsü, koba mapa talangka bendanger senoka aitba ajanga kangshia arudar, ta ashi.

Paisa, Lok Sabha elections nung tajangzük angutsü aser electoral bond ken o nungi nüburtem meranglokdaksütsü atema CAA ya benoker, ta ashi

Tripura Congress MLA aser taoba minister Sudip Roy Barman-i CAA anemba lemsatepogo.

Kidanger linüktem nung nütsünyongsük agi ajema aliba nüburtem atema aria bilemstüba lemsatepba den Roy Barman-i, CAA benokba ajanga Tripura nung tribal telungpurtem asüingsashidaksütsü akok, ta ashi.

Paisa, tamangba yimsü dak ajemdaker lisopur jenjang agütsüba ajanga India rongsenketzüing nung takoksa ajurutsü aser arrtsü adener fundamentalist tashitem tali akangshidaksütsü aser iba ajanga CAA ya tagidak maka kümdaksütsü, ta ashi.

MLA, Dr. Sukhato-i Pughoboto nung CC Road & Agri Link Road lapoktsüogo



Dimapur, Monupii/May 19 (TYO): MLA, Dr. Sukhato A-i May 18 nü Pughoboto kübok Kitami yimtsüing nung Cement concrete road aser Ghokimi yimtsüing nung Agri Link Road lapoktsüogo.

Lenmang lapokba sentong nung ADC Pughoboto, Tiameren Chang; SDO (C) R Daniel Angami; SDPO Hankiumong; EAC Khriethozo Pfukri aser tanga ketdangsurtem densema liasü.

Cement concrete raod yagi

Asukiqa aser Aphuthemi na sendaktepdaksür aser iba ya LADPF 2023 - 2024 Iconic Project kübok yangluogo. Kasa mapang nung Agri Link Road ya RD Block Ghathashi kübok VDB-i senotsü agüja yangluogo.

Manipur: Yimdaklirtem aser Meira Paibis-i AR pelashishia agizük

Imphal, Monupii/May 19 (Agencies): Telungpurtem mintoktsü atema longjemer inyakba sülen Manipur nung Bishnupur district kübok Leimaram Waroiching yimtsüing nung Assam Rifles amenokogo.

May 16 nü mejangjaba nisungtemi Uyok yimtsüing maka liasü. Iba sülen Leimaram yimtsüing nung amenoka aliba India Army aser Assam Rifles na senteper yimtsüing amakertem mintok.

Khatepba teyalong nung local tetsür rights group; Meira Paibis züingsem 75 shi security forces-i Waroiching nungi Leimaram-i anina liasü.

Taoba mapang Leimaram


Waroiching nung Assam Rifles amenoka aliba anema nüburtemi longkak aita liasü aser iba sülen 5/9 GR battalion melen.

Ajisüaka May 17 nü Bishnupur district Commissioner indang office nung senden ka amenba sülen tangatettep ka dangi aruogo.

Senden nung Assam Rifles Commanding Officer, Bishnupur DC aser SP, Meira Paibi telok, local club tem aser nüburtemi shilem agia liasü.

Iba tenangzüktepba yangluba ajanga local tem dang temelaba meshir Assam Rifles iba tesem nung inyaksangshitsü atema lenmang lapoktsüogo.

IndiaArmy-i Manipur nung prangbong injang aika ngutet



Kohima, Monupii/May 19 (TYO): Manipur nung Imphal East district kübok Maphou dam temeket nung prangbong ijang aser hadir balala yua aliba indang osang tejangja ka angazükba sülen Indian Army-i yakta iba tesem meita ao aser 5.56mm INSAS Rifle ka, 12 Bore Guns ana, 303 Rifle ka, injang aser tanga hadirtem

nguteta liasü. Item prangbong injang aser hadirtem ya Manipur Police nem bendanga agütsüogo aser ken o maneni bushisüingdangtsü, ta Manipur, Nagaland aser Southern Arunachal Pradesh Ministry of Defence PRO & otongdar-i sangdong ka ajanga metetdaksü.

AR-i Zhipu yimtsüing nung 'Meri LiFE' sentong ayongzüka agi



Dimapur, Monupii/May 19 (TYO): Assam Rifles-i Phek District kübok Zhipu yimtsüing nung 'Meri LiFE' awareness sentong ka ayongzüka agi. AR-i yimdaklirtem dang pei jurila aser pei meketa aliba tzi mopung wazüka ayutsü atema libaliro tajung angazüka benshitsü ajungshia liasü.

Iba sentong ya, conservation, moderation, aser sustainable practices dak sendakba nung tangazükba agütsütsü nükjidong nung ayongzüka agiogo. Item inyakyimtem tajangzük indang metetdakja lokti ajaki shilem agiba libaliro tajung ka

benokdaksütsü nükjidong nung iba sentong agiogo.

Yimdaklirtem nem, jana tali madaokdaksütsü, tzi wazüka ayutsü aser renewable energy sources adopt asütsü tangazükba agüja liasü. Iba sentong ajangsa tzi mopung den putepa aliba ajanga nisung taküm nung tajangzük anguba indang tangazükba agüja liasü.

Iba sentong nung yimdaklirtemi kanga jangrabangra shilem agiogo aser iba ajanga longjemer inyakba ajanga alima tzi mopung aser pei jurila taküm nung koda temelenshi adokdaksü iba indang sayur.

Tanü Lok Sabha constituency 49 nung election agitsü



Baramulla, May 19, 2024: Hombarnü Lok Sabha election shilem pongububa agitsü lia Amongnü Jammu & Kashmir kübok Baramulla nung Polling ketdangsertemi Electronic Voting Machines (EVM) aser Voter Verifiable Paper Audit Trail (VVPAT) machines bener pepei polling stations-i apusoa aodang tangokba noksa nung angur.

New Delhi, Monupii/May 19 (Agencies): Hombarnü states aser Union Territories 8 nung Lok Sabha election shilem pongububa nung menden 49 atema election agitsü.

Lok Sabha constituencies 49 ji Uttar Pradesh nung 14, Maharashtra nung 13, West Bengal nung tenet, Bihar nung pongu, Odisha nunga pongu, Jharkhand nung asem, Jammu and Kashmir nung menden ka aser Ladakh nunga menden ka lir.

Lok Sabha election mezüngbuba shilem April 19 nü Lok Sabha constituencies 102 nung agia liasü, tanabuba shilem April 26 nü menden 88 atema agi, election shilem

tasembuba May 7 nü menden 93 atema agi aser May 13 nü shilem pezübuba agia liasü.

2019 küm Lok Sabha Elections nung item menden 49 nungji BJP-i aniba NDA teloktepi menden 41 nung takok ngua liasü aser Congress-i aniba UPA-i menden ana aser tanga party temi menden trok nung takok ngua liasü.

Lok Sabha election shilem pongububa nung candidate 695-i tokteptsü aser tongtibang candidate tem rongnung Union Minister tem- Rajnath Singh, Smriti Irani aser Piyush Goyal nung den Congress lenir, Rahul Gandhi densema lir.

Defence Minister Rajnath Singh-i Lucknow menden

nungi tokteptsü, Rahul Gandhi-i Raebareli menden nungi BJP candidate Dinesh Pratap Singh den tokteptsü.

Amethi menden nung BJP MP, Smriti Irani-i Congress candidate, Kishori Lal Sharma den tokteptsü aser Mumbai North menden nung Union Minister Piyush Goyal-i Congress nungi Bhushan Patil den tokteptsü.

Bihar kübok Hajipur menden nung LJP lenir Chirag Paswan-i RJD lenir Shiv Chandra Ram den tokteptsü aser Baramulla menden nung National Conference lenir Omar Abdullah-i Peoples Conference lenir Sajad Lone den tokteptsü.

Kashmir nung BJP Sarpanch ka khaset aser raliwalir ana yiru

Srinagar, May 19 (Agencies): Lok Sabha election atema tatembangbuba nüboyimba anogo nung Baramulla constituency, South Kashmir nung kiralongrartemi amakdang Jaipur nungi aruba raliwalir apuani na yiru aser taoba mapang BJP sarpanch ka khaset.

Jammu & Kashmir Police-i ashiba agi, Anantnag nung kiralongrartemi Jaipur nungi aruba apuani na dak injang khaloktsüba sülen tena yirua hospital-i anir ao.

Iba tatalokba sülen minute 30 tsüingda Shopian nunga kiralongrartemi taoba mapang sarpanch aser BJP den külemi inyaksemer, Aijaz Sheikh khaset.

Iba tatalokba sülen sepaitemi Anantnag aser Shopian naprongla nung kiralongrartemi mita ao tenzükogo.

Iba tatalokba aija taoba mapang J&K chief minister aser PDP Tir, Mehbooba Mufti-i, "Tanü Pahalgam nung raliwalir ana amakdang yirutsüba aser Hurpora, Shopian nung sarpanch ka khasetba nungji tashishitsü keta lir, kechiyong kecha kuli makai South Kashmir nung election thinena liasü. Ano India sorkaribo tensa junga dang lir ta jembir," ta metetdaksü.

National Conference lenir Omar Abdullah-ia item tatalokba aija X ajanga, "South Kashmir nung kiralongrartemi raliwalirtem aser BJP nung

inyaker ka anema inyakba tatalokba osang angashia jashir. Ni item tatalokba aitsür aser Aijaz Ahmed'er kibong züngsemtem den mangyim jashi lemsateper. Ni Jaipur, Rajasthan nungi aruba Tabrez aser Farah nata tekaraba nung taneptsü angutsü asoshi sarasademtsür," ta metetdaksü.

April 17 nüa Anantnag kübok Bijbehara jila nung tanga state nungi arua aayanger ka khaseta liasü. April ita nungsa Shopian nung kiralongrartemi Dehradun nungi arur ka injang agi yiruja liasü. February ita nunga Srinagar nung kiralongrartemi Amritsar nungi arur ana injang agi yirutsü aser tena rongnung kabo süadok.



Indian Meteorological Department (IMD)-i taruba anogo asem tashi India tesem balala nung kanga tatsük asütsü, ta tekümdangtsü metetdaksüogo. Talisa Delhi, Punjab, Haryana, Rajasthan aser Uttar Pradesh state tem nung kanga tatsük asütsü, ta IMD-i metetdaksü. Taaruba anogo pongu tashi northwest India tesem aika nung kanga tatsük asütsü aser taruba anogo asemnü tashi east & central regions nung kanga tatsük asütsü, ta parnoki metetdaksü.

Ozüng tasen asem anema benokba ken o SC-i angadangtsü

New Delhi, May 19 (Agencies): Hombarnü Supreme-i Parliament nung agizükba criminal law tasen asem anema benokba ken o angadangtsü.

Justices- Bela M Trivedi aser Pankaj Mithal nati akümba vacation bench kati iba ken o angadangtsü.

Yaküm December 21 nü Lok Sabha nung ozüng tasen asem- Bharatiya Nyaya (Second) Sanhita, Bharatiya Nagarik Suraksha (Second) Sanhita aser Bharatiya Sakshya (Second) Bill agizüka liasü aser December 25 nü linük Tir Droupadi Murmu-i item bill asemprongla agizük.

Item ozüng tasen asem jagi Indian Penal Code (IPC), Code of Criminal Procedure (CrPC) aser Indian Evidence Act melentsü.

Item ozüng tasen anema

advocate, Vishal Tiwari-i, Parliament nung ozüng tasen asem atema o melemtepi agizük, kechiyong opposition MP tem aika anenja liasü, ta ashi.

Paisa Supreme Court dang item ozüng tasen asem asadangtsü atema mongin committee ka tentettsü atema tetuyuba agüjang, ta mepishia lir.

Item ozüng tasen asem ajanga British nungeri yimsüsüba mapang aliba criminal laws agientsü.

Yaküm December nung Parliament nung security raksaba nungi mangatettep adoka Parliament nung Opposition züngsem 143 anentsür lia item bill agizüka liasü.

Asükwa mongpu Parliament nung House anaprongla nungi MP ajak senteper 143 anenja liasü.

India nung mapa mangur shilem 83 bo lanurtem lir: TMC



Kolkata, May 19 (Agencies): Ato kilonser Narendra Modi-i onük balala nung tenangzükbatem mataloktsü, ta tai tonglokja Amongnü Trinamool Congress (TMC) lenir Amit Mitra-i, tang linük nung mapa mangur shilem 83 bo lanurtem lir, ta ashi.

Mitra-i, TMC ya INDIA teloktep nung densema lir, ta metetdaksü. Kolkata nung osangbenertem senden ka nung jembiba Mamata Banerjee sorkar kübok taoba mapang West Bengal nung finance minister Mitra-i, "Linük nung mapa mangur shilem 83 bo lanur tetsür-teburtem lir," ta metetdaksü.

NDA sorkar indang Skill India programme ajanga tajangzük junga magutsür, kechiyong linük nung lanur shilem 4-i dang vocational training agiteter, ta pai ashi.

Ato kilonser Modi nung mataloktsü, ta shia pai, "Tang linük nung ghonda shia tetsürtem anema inyakba tatalokba 51 lir," ta ashi.

Paisa, tesüiba küm 50 tsüingda kibongtem nung financial savings tang

tajemtiba lir, ta ashi. Sorkari aluyimertem nem minimum support price (MSP) magutsür aser tang anogo shia aluyimer 30 soseta asür, ta pai metetdaksü.

"Tesüiba küm ter tsüingda bendanglen sentsüh shilem 100 agi teimba kümogo. Küm ter tejaklen sentsüh crore 3,65,000 aliba nungi 2022-23 financial year nungbo sentsüh crore 7,48,000 jungogo," ta TMC lenirisa metetdaksü.

Mitra-i, 2021 küm West Bengal assembly elections nung Mamata Banerjee-i aniba TMC-i menden aika nguteta takok tulu anguba sülen nungi Centre nung BJP-i aniba sorkari state nem fund agütsüba anenadokogo, ta ashi.

"Onoki MNREGA aser Awas Yojana schemes kübok sen ka danga mangu, kechiyong 2021 küm parnoki tamakok ngua liasü," ta pai ashi.

"Lakshmir Bhandar' scheme kübok Bengal nung tetsür crore 2.15 nem senotsü tsütsü tashi agütsüogo. Tangbo BJP-i tetsürtem nem sen 100 tali tutsütsü atema jembir," ta pai ashi.



TIR YIMYIM YIMOBILEM (EDITORIAL)

DIMAPUR TENTONÜ, MAY (MONUPII) 20, 2024

BJP indang Mission 400 metongtetsü akok

- P Tiamongba Aier

Maharashtra, Bihar, Karnataka, Telangana, Rajasthan, Haryana, Punjab aser Delhi nung Bharatiya Janata Party (BJP) nem menden teimba nung takok mengudaktsü atema INDIA bloc-i asalentong yanglua inyaker. Külen, Congress-i Narendra Modi-i aniba National Democratic Alliance nem Andhra Pradesh, West Bengal, Telangana, Tamil Nadu aser Odisha nung tajanzük mengudaktsü meranger. Iba ajanga BJP atema Maharashtra ya kanga tongtipang kümogo kechiyong Congress, Shiv Sena (Uddhav) o Nationalist Congress Party (Sharad Pawar) teloktem lokteper tentetba Maha Vikas Aghadi ajanga takok tulu angutsü ta ashir. Sharad Pawar-ibo INDIA bloc-i Lok Sabha menden 30 nung takok angutsü ta jembir aser June 4 nü iba ya shitak atalokra NDA-i Maharashtra nung menden 24 agi matongtsü. Maharashtra nung Dalit-Muslim nungeri INDIA bloc nung yariteper Shiv Sena (UBT) aser NCP (Sharad Pawar) pusemer. Sharad Pawar-i Congress lennir aika den jembia arur aser pai NCP-i Congress den lokteptsü atema lenmang bushiteper. 2024 elections sülen Opposition politics balaka yanglushitsü akok ta Pawar-isa shiogo. Paise taruba küm ana tsüngda regional party aikati Congress den tesentaktep tajungba akümtsü mesüra Congress den lokteptsü akok ta metetdaktsüogo. INDIA bloc-isa Karnataka nung Lok Sabha menden 12 tema angutsü teimla lir. 2019 nung BJP-i menden 28 nungi 25 nung takok nguteta liasü. INDIA bloc-isa Rajasthan, Madhya Pradesh aser Chhattisgarh nunga menden 15 shi angutsü tenük yoker. Parnokisa Haryana, Delhi, Punjab, Jammu and Kashmir aser Himachal Pradesh nung tajanzük angutsü teimla lir. Taoba election nung BJP-i Haryana nung menden 10, Delhi nung menden 7, Punjab nung menden 2 aser Jammu and Kashmir nung menden 3 nung takok ngua liasü. 2024 election nung INDIA bloc-i item state tem nungi menden 20 bosa angutsü imlar. June 4 nü Lok Sabha election results ji taoksatsüka asütsü aser iba ya Narendra Modi noktangbaji Opposition ajungai tenüng agitsü ta INDIA bloc atema strategist temi ashir. Congress lennir kati ashiba agi parnoki regional party shia nem tematiba tashi agütsü aser parnoki teloktep tangatetba sülen anidaker. Congress aser parnok den yariteper temi kechisarena nung jenjang atuba, mapa manguba, aluyimertem timtem, company tulutem dang ajanzükba aser linük temzüng kümzüka ayutsü onüktem nung temulung agütsür. BJP-i anir parnok den yariteper temi tan Lok Sabha elections nung INDIA bloc anema mapa aika inyakogo aser tamangba yimsü nung ajemdaker inyaksü merangogo saka INDIA bloc-i parnok nükjidong dak ranglokba metoktsü. Congress pusemer aika aliba state tem- Rajasthan, Haryana aser Chhattisgarh nung Bhupinder Singh Hooda, Randeep Surjewala, Selja Kumari, Ashok Gehlot, Sachin Pilot, TS Singh Deo aser Bhupesh Baghel amala lennirtem tsüngda tesentaktep meraksa aser kati ka lenji otepa maparen inyaker. Taküm Lok Sabha elections nung Congress sasep longjemba aser INDIA bloc nung adenertem kati ka yaritepa aruba ya takok tulu ka lir aser iba ajanga BJP-i NDA atema khuret tulu ka asütsü aser BJP indang Mission 400 nung tetsükdaktsü ajurutsü akok.

OLEMSABANG

Naga lima dak apet nungjalok kar

- L. Kika Pongener.

Kibong ka nung kodang jala-jabaso ka sodir, tenung jatsütsü atema tetsü-tebou nungdener, mesura tetsü-tebou-i tsükchir tekolak (Mangko) alepba nokinketer konang-naroküm, kika-suchiba konang-naroküm, yimden, arogo, loktiliba tenzüka aruba konang-naroküm, linuk atema mapa tajung inyakba konang-naroküm...Iba amala tenung naroka jatsür. Otsüla-oboula nunger mapa meranga inyaka ochishia lia aru. Anungji asenok ya ochishir aser mapa meranga inyakba kin aser ibala chirnur aser semchirtem lir. Ajisuaka, tesasatsüka, tanu asenoki iba konang-naroküm tenung tajung-ji samadaktsüogo. Tanubo asen Naga lima aser nuburtem dang tenung tamajung-ang jaloktsütsüsa asen sasa litetogo. Anungji asen Naga nunger dak apet nungjalok tenung kar reprangdangdi. Ashiko, asenoki manganutsü sudi, saka asenok dak apet jaloktsür adi.

Benjong-bentsü sapuba lima (Land of lovers of Festivals) ta ajatsü kanga tapet lir. Asen sorkar-i tangar bendanger dang numadanga "Land of Festivals" ta sangdonger...Saka shitakba (Reality) nung jembidi sura, "Benjong-bentsü meroba/sapuba lima ta ajatsü-ang kanga tapetba lir. Moatsü-mong, Tsüngrem-mong, Sekrenyi, Tuluni, Toko-Emong, Mong-mong, Aoling Festival etc. item benjong yabo sobaliba aser tamangba den sendaktepa lir, anungji itemjibo metsüngareta amongtsüla. Ano tanu putu nung purateta amongba 'Hornbill' benjong ajia majungbo masü amongtsüla. Ajisuaka, alu zünger nungi tenzüker teloktentet zünger mezüngma khangtepa saru sarur 'Jubilee Benjong' amongba aser chiyungtepba item yabo-sa melenshitsüla.

Yimden bangdak aikati yimsu asüba lima (Land of govern by many Governments) ta ajatsü kanga tapet lir. Alima nung yimden bangdak aikati yimsu asüba limaji Naga lima ya asütsü. Tema sorkar, telung sorkar, yimtsüng putu menden, colony council, mulongtet telok (NGOs) senso telongjem etc. yimden bangdak zünger mezüngma agi yimsu asüba limaji Naga lima ya asütsü. Aji oda, yimden bangdak kwika lir saru-saji paikaji lir.

Temelen saru aser saru-saji saruba lima (Land of Taxes and Collections) ta ajatsü kanga tapet lir. Jila tulu ajak nung sungküm (Gate) yanglur telok-tentet aikati Passenger Gari/Mall Gari ajak dang saru sarur. Sorkar tenzüker danga saru meshir, Contractor/Supplier danga saru meshir aser yimtsüngtem danga saru meshir. Ibagaji sensaker kibongtem balaka talitsü kanga tasak kümogo. Business-walla dang Tax saru meshiba agi parnoki iba saruji osettsüset jenjang nung shiloktsür meshir, ibajagi osettsüset aser chiyungtsü nung mapang shia jenjang tupet atur. Contractor/Supplier dang percentage meshiba agi terenlok mapa inyakba nung tetsükdaktsü ajurur aser terenlok mapa-a junga meinyakteter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Poland nung tang mezüing Arogoi kasa kiyimertem moatsüogo



May 14, 2024 nü France kübok Poitiers jila nung Catholic Arogo Tenla kidang menden bendener mi senokja aliba noksa aser Mari kürakyanglu tekolak tangzükja aliba noksa nung angur.

May 19, 2024: Poland nung tang mezüing kasa kiyimertem (tetsür o tetsür na mesüra tebur o tebur na kiyimertem) Arogoi moatsüba sentong ka agiogo; iba sentong nungji Catholic aser Protestant putirtemi shilem agia liasü.

Putirtemi moatsüba kasa kiyimertem rongnung Catholic Khristan Artur aser Jan na densema lir.

Osangbener den jembidang Artur-i, "Moatsüba sentong ya onok atema kanga tongtibang liasü. Künaprongla tamangertem lir. Küna taküm alitsü tashi atema iba ya kanga tongtibang liasü," ta ashi.

Artur-isa, "Künaprongla tamangertem. Tamang ajanga künati taküm nung timtem aika tizüktetogo. Mapang kaka nungbo künaprongla atema

tamangji rongnentsü tulutiba liasü," ta metetdaksü.

Jan-i, "Küna tongmelang nisung; tangar amai künata meimteper aser timtemer. Tesempa ya teraksatsüba tamajungtiba lir. Tsüingrem temeim aser kiyonger temeimji tongtibangtiba ozüing lir, aser iba ya Yisu tesayuba nungi lir," ta ashi.

Warsaw nung ayongzüka agiba sentongji Evangelical Reformed Parish Church nung pastor, Micha? Jab?o?ski leniba nung agi aser Evangelical Church of Augsburg Confession nung pastor ka aser Roman Catholic putir katia shilem agia liasü.

Poland nung Catholic Arogoi LGBT+ onük nung akhi tangatetba nungi masetshir, ajisüaka yaküm

Vatican-i Catholic tangatetba ka sangdonga kasa kiyimertem moatsüsu asoshi putirtem nem temelaba agütsüba sülen tang mezüing Poland nung Arogoi kasa kiyimertem moatsür.

Kasa kiyimertem moatsüba sentongji Faith & Rainbow Foundation nungi Uschi Pawlik-i ayongzüka liasü.

Osangbener den jembidang Pawlik-i, Catholic Khristan ka ama tamangertem aikati kasa kiyimertem moatsüba magizükteter, ta ashi.

Laisa, "Ajisüaka Pope Francis-i Arogo nung tesendaktep tsütsü tangatetba melenshitsu sayuogo. Poland nung Roman Catholic putirtem-a aikati LGBT+ nisungtem pusemer," ta metetdaksü.

France nung Khristantem anema inyakba kanga bulua akümer

May 18, 2024: Taoba Mongolbarnü France kübok jila ka nung Mari kürakyanglu tekolak lepdoktsü aser Tenla kidang menden rongdoktsü.

Yaküm France nung Khristantem anema inyakba tatalokba 1,000 jungnüa liasü.

Mongolbarnü Poitiers jila nung aliba Roman Catholic Arogo Tenla kidang mi senoktsüba sülen firefighters-i miji ensepteta liasü. Mi agi Tenla ki jara, atem aser osettsüset kar densema arong.

Mongolbar anepdang 8:30 ako nung Rev. Albert Jadaud Tenla ki tonga aruba mapang nung melung malemtsüsa kecha meprangteti liasü.

Rev. Jadaud-i, "Anüingdang 11:00 ako nung ni fire safety officer ajuru. Onoki Tenla kidang lapokdang telung ajak nung mokozü liasü," ta metetdaksü.

Iba Tenla ki khenpiga atema shibangogo aser ibaji ajanga Arogo nung asüpila sentong kabo Migné-Auxances Tenla kidang agi.

2023 küm France nung Arogo kiojen aser Khristantem anema inyakba tatalokba 1,000 jungnüa liasü.

Taküm March 20 nü France nung Ministry of Interior & Overseas-i, 2023 küm Khristantem anema tesempa agi inyakba tatalokba shilem 32 agi teimba aküm, ta metetdaksü.

Interview ka nung jembidang ministry nung otongdar, Camille Chaize-i, item tatalokba shilem 90 bo Arogo kiojentem raksatsüba mesüra Khristantem leper raksatsüba liasü aser tanüingba shilem 10 ji Khristan 84 anema inyakba liasü, ta metetdaksü.

Item tatalokba nung ajemdaker taküm Easter hopta nungbo sorkar ketdangsertemi Arogotem nem security sepai 10,000 lemezükja liasü, ta Observatory for Intolerance and Hatred Against Christians in Europe (OIDACE)-i metetdaksü.

OIDACE-i ashiba agi, taküm küm tetenzüklen nungi

France nung Khristantem anema inyakba kanga bulua kümдар, aser item tatalokbatem rongnung Arogo kiojen pongu rongdoktsüba, Tenla kitem mesüra Khristan lepertem rasatsüba aser Kangki raksatsüba densema liasü.

France nung temeshi hopta (Palm Sunday nungi Easter tashi) mapang nung Arogo 4,530 nung tekülem agiba mapang tamangertem kümzüksü atema Interior Minister, Gerald Darmanin-i police aser sepai 13,500 lemezükja Tenla kitem kima nung security agütsü.

Easter tekülem sentong agidang kiralongra tatalokbatem nungi Khristantem kümzüksü atema Interior Minister-i Khristantem nem security agüja liasü.

Tesüiba kümtem nunga France nung kiralongra tatalokba aika liasü aser taküm küm tetenzüklena kiralongra asalentong anabo nokdangteta liasü.

ANOGO ABEN TSÜNGREM DEN

Tabensa osang tajung

"Aser kodang ni nenok dangi arudir Khrista temoatsü tabensaba agi arutsü ta ni metet"

(Rom. 15:29)

Mezüing Christmas anogo nung sannükertem dangi osang tajung bener adok. Osang tajungji tepelatsü osang tulu nüburtem dangi bener aruba (Lk. 2;10). Osangtajung tetezü tajungtibaji Pauli 1 Korint 15;3,4 "kechiaser ajak dang tongtibangba ama ni kechi agizük, ibaji.. .Lai-i shia aliba amaji asen menen asoshi Khrista asü, aser Pa arem aser Lai nung aliba amaji tasemnü buba nung Pa shia arudaksü." Temerük aser tabensa osangtajungji ibai lir. Entokba mesüra bendenloktsübaji teraksa lir.

Yisu Khristaji Tsüingrem osang tajung lir. (Yn. 14:6.) Teperiba osang tajung tetezü Khrista ajanga temoatsü ajak asenoki agizük, item otem amshia asenok meshiteta lir. Kodang yimjung osang jembir, Khristai tenla agütsüba indang asenoki jembir (Ef. 2:14-16; 6:15). Taochi osangtajung jagi Khrista kümtetdakba indang jembir (T.mapa 20:24; Ef. 2:8)

Tsüingrem yimli osang tajung jagi Khrista chuba akümba indang jembir (Lk. 8:1; Isa 52:7). Yisu Khrista nungi pilar temoatsü mali (Ef. 1:3). Khrista asenok asoshi kechi mapa renemtsü iba nung Tanela Temeshi kecha bendenloktsü makok. Ochi Tanela ama Tanela Temeshi-i asenok ochiba Khrista dangi anasaba anasaba anitsü. "Pai mulungba nung kecha mejembitsü. Pai Khristai mulungba kechi aji agitsü aser asenok dang ashitsü (Yn. 16:13-15). Iba nung tamakok angur osang tajung tanga sang nung aputsü." Khristan kümdanga jajang.

Nigeria nung ano putir ka puer ogo

May 19, 2024: Nigeria linük 2022 küm puer aoba putir anabo nung kiralongrartem ano putir tang tashi kechi nung aliar ka puer ogo, aser ibaji mejangja mesüra süadokerar densemabo taküm küm asütsüa akok.

tenzüker tang tashi nung putir pezü puer ao, ta osang ka ajanga metetdaksü.

Prangpong amer telok kati putir, Basil Gbuzuo puer aoba sülen tang tashi pai Arogo den tongtepratep mesüteter, ta kasa osang ajanga metetdaksü.

Onitsha Archdiocese-i Catholic charity Aid to Church in Need (ACN) nem iba osangji tejangja metetdakja liasü.

Archdiocese of Onitsha nung chancellor, Prudentius Aroh-i shidi ka ajanga Onitsha nung tongti putir Valerian Maduka Okeke dang Khristan ajak dang putir Basil tekaraba nung chioktsü atema sarasademjang, ta mepishia metetdaksüogo.

Taküm Nigeria nung Benin City Archdiocese nungi Claretian missionary ana den Arogo ka nung putir ka puer oa liasü, ajisüaka par asemprongla chiokogo.

Ano 2019 küm putir ka aser

2022 küm puer aoba putir anabo nung kiralongrartem ano putir tang tashi kechi nung aliar ka puer ogo, aser ibaji mejangja mesüra süadokerar densemabo taküm küm asütsüa akok.

2023 küm alima nung putirtem mesüra Khristan lenirtem teimba puer aoba linükji Nigeria liasü. Yaküm Nigeria nung sister asem densema putirtem puer aoba tatalokba 28 liasü.

Nigeria nung Arogo lenirtem den külemi ACN-ia putir Gbuzuo tangsa chiokang ta takhangba agütsüogo.

Nigeria nung Khristantem teimtiba tepsetbaji 2023 küm liasü; yaküm Nigeria nung Islamic telok balalai Khristan 8,000 dak tema tepsetogo, ta International Society for Civil Liberties and Rule of Law (Intersociety)-i metetdaksü.

Nigeria nung 2023 küm January ita nungi 2024 küm January ita tashi nung (ita 14 tsüingda) Khristan 8,222 tepset.

Nigeria nung civilian ki meyirjang aika rongdoktsüogo, Khristantem tekülem ki 18,500 shi raksatsüogo aser Christian/Traditional education centres 2,500 shi raksatsüogo.

AO OSHI ANGAZÜKDAK:
TANÜ ANGAZÜKTSÜBA OJANG



Süngtak

(n) süng tatsüsü lepteta süngdongi atutsü atema alenloker
(short wooden sticks fix on tree to climb)

* Süngdong talangi atutsü atema süngtak aika yanglua alenloker.

Süngtem

(n) süng tulu tatsüsü (short log)

* Alu nung süngtem aika mezüdaka liasü.

OLONG PAITEP # 6792

1		2		3		4	5			
				6						7
		8								
9				10		11				
			12						13	
						14				
16						17				

TIPILEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzüba - (5)

OLONG PAITEP # 6791 TELANGZÜBA

TIPILEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.



ASHIKÜLAK AGI TETSÜR AGIBA
JUNGKAI ADOKER:

Alokba : Tantsü, na kümdangangno !!!
Kinungtsü : Hai, ni kechi atema kümdangtsü ?
Alokba : Tanü asüng ya nai ni ashiba kecha manger, ano kiyonger nungi ni ne indang ajak angashiogo, na shiba densa kechi süa kazür tang shiangjo ?
Kinungtsü : Na tasaden no! Hi na angudang asen chiri majepba ya Kanga pelaangno, na ama soru tamajung sentsü tanak , Na tsümaleni shishi talu majung , kechiyong police gate ajak nung I L P meshir, Ena. Nai ashikülak agi kü nem puatsü mim mozü agütsür ni na meimdaksü, saka iba mim mazüji joko liwaa kümogo, Tsüngremi kü dang pongmang mangdang nung jangjangja sayuogo, joko ni na majinür aser memeimer, anungji tanuri sosemaka ana malitsü sala !!!!
Alokba : O mekaka!!!
~ Lilir : I. Kilang , Ajem, Indisen ,Dimapur,

CM Sarma-i kü dang mapa nungi anentsü ashi: IPS officer Anand Mishra



Guwahati, May 19, 2024

(Agencies): Bharatiya Janata Party (BJP) aser Assam Chief Minister Himanta Biswa Sarma nungeri pa mapa nungi anisüngzüksü atema mesüzük aser aika nangzük ta taoba Assam IPS officer Anand Mishra-i ashi.

Himanta Biswa Sarma-i pa BJP nung anioktsü aser menden tajung agütsüsü nangzük. Item ajanga pai Indian Police Service (IPS) mapa toktsü ta Mishra-i ashi.

Pai bendanga agüjaka aser pa dang nangzükaka BJP-i pa züngdok ta paisa ashi.

"Himanta Biswa Sarma aser

BJP-i ni BJP party nung züngsemstsü aser Indian Police Service mapa toktsüsü nangzük saka parnok ni ashiooktsü aser party nung mezüngok" ta Mishra-isa metetdaksü.

"BJP lennirtemi ni parnok madak lennir ka akümtsü tetsübu agi ni züngdok. Ni kü kija dang aküm aser iba jagi politics nung kü sasa mapa inyaksü tenzük" ta paisa shisem.

Iba jagi MP elections nung ni independent candidate ka ama tokteper aser takok angutsü ta Mishra-isa ashi.

"Himanta Biswa Sarma-i tiyazü nangzükba atema

mepelar. Ni pa kanga akhümtsüba liasü. Pa ya lennir tajung ka ta ni bilem saka iba amaji matalok. Pai ni BJP nung medendaksü" ta paisa metetdaksü.

May 18, 2024 nü Bihar nung election rally ka nung Chief Minister Himanta Biswa Sarma-i Anand Mishra aitsü.

Congress aser RJD teyari agia Mishra-i Buxar Lok Sabha menden nung BJP anema inyaker ta Sarma-i ashi.

Sarma-isa Mishra nem senotsü agütsürtem asüngdang aser Tejashwi Yadav o Lalu Prasad Yadav na den tesentaktep aliba ashi.

People's Conference party-i police nem vote enoktsüsü mepishir

Aizawl, May 19, 2024

(Agencies): Mizoram nung People's Conference party-i Election Commission Principal Secretary SB Joshi dang Mizoram police personnel nem vote enoktsüsü maongka agüjang ta mepishia shidi ka züluogo.

"Election Department-i

police tem vote enoktsüsü atema mapa inyakogo saka state adena orr election mapa inyakba Mizoram Police 1047 tashi April 19 nü Mizoram nung Lok Sabha 2024 election agidang shilem magitet" ta parnok ECI Secretary dang ashi.

Lok Sabha election 2024

nung Electronically Transmitted Postal Ballot System (ETPS) amshir saka Mizoram police 1047-ibo votes magütsütet.

"Parnoki vote menioktsüba ajanga Mizoram election result nung kongshitsü anungji ECI-i mapa inyaksü mepishir" ta People's Conference party-isa metetdaksüogo.

Manipur nung Jharkhand nunger ka khaset; 2 yirutsü

Imphal, May 19, 2024

(Agencies): Naorem-thong Khumanthem Takyel Kongbal nung mejangjaba nisung kati arishi 41 tain tebur ka khaset aser ana yirutsü.

Iba lendong ya yasüng 7:30 ako meta Lamphel police station

kübok atalok.

Iba nisung ya Ram Hangsada ta jangjaogo aser pa ya Jharkhand nunger liasü. Maneni Bittu Murmu (22) aser Mitalal Soran (50) na yirutsü aser tenaprong ya Jharkhand nungi lir.

Tena RIMS Hospital nung anepaludar. Par asemprong ya Keystone Infra Pvt. Company nung aayangertem lir.

Iba tatalokba atema Lamphel police station nung ken o ka benokogo aser police-i bushisüngdang tenzükogo.



Assam kübok Cachar district nung police-i Rs 105 crore jenjang heroin apuba sülen agiba noksa ka angur. Mozü shibelener nisung asem ya Mizoram nunger lir aser Mizoram nungi heroin bener aru. Par aseme gari ka nung secret chamber telung nung miima bena liasü saka police-i sapon pongdangtem nung enoka aliba heroin seret 10.33 bena alibaji apu.

Afghanistan kübok Faryab province nung tzümetsüng lendong nung nisung 66 asü



Kabul, Monupii/May 19 (Agencies): Afghanistan kübok Faryab province nung tzümetsüng lendong nung nisung 66 süogo, ta province kettangürtemi metetdaksü.

Tzümetsüng agi Faryab province kübok district aika Honibar aonung tzümetsüng agi kongshia liasü aser iba ajanga nisung taküm samaba den alirongsen aika akoksaogo, ta Faryab governor otongdar Asmatullah Moradi-i Deobarnü sangdong ka ajanga metetdaksü.

"Tzümetsüng aruba ajanga nisung 66 süogo," ta pai ashiba den, nisung pongu yiruogo aser aika samara bushidar, ta shisem.

Tzümetsüng agi ki 1,500 dak tema raksatsüogo aser alu hectare 400 dak tema metzüngba den kisetshiruru aika taküm samaogo, ta paisa ashi.

Kasa province nung Hokolbarnüa tzümetsüng lendong nung nisung 18 süogo, ta Moradi-i ashi.

Ghor province nung tzümetsüng agi nisung 50 tepsetba sülen anogo ka lir Faryab nunga iba lendong atalokogo.

Kabul nung amendaker aliba TOLONews sangdong ka ajanga ashiba agi, tzümetsüng agi Ghor kübok Ferozkoh yimti shilem 80 bo raksatsüogo.

Afghanistan ya mapang shia yipru, menoknok aser tzümetsüng amala lendong agi kongshir aser United Nations-i ashiba agi, tzü mopung melenshiba ajanga tamajungtiba kongshiba linüktem rongnung Afghanistan ya-a ka lir.

Hopta ka tejekdang Baghlan province nung tzümetsüng lendong nung nisung 300 dak

tema süa liasü, ta UN World Food Programme aser Taliban kettangürtemi metetdaksü.

Tang tzümetsüng agi linük mekongshi tsüngda April tom nungi May tetenzüklen tzümetsüng agi Afghanistan nung province 10 dak kongshia liasü, ta kettangürtemi ashi.

Tzümetsüng ajanga alu aika metsüngbangogo aser nashi cang aika arakseta süogo. Afghanistan nung nütsünyongsük million 40 dak tema lir aser shilem 80 bo aluyimba dak metaloker alir, anungji iba ya nüburtem atema takoksa tulu.

Afghanistan nung mapang talangka tzünglu marui lir tanga kanga sashia arudar, aser tzümopung melenshiba ajanga lendong balala bener arutsüba den raratsü atema linük renema mali, ta mongintemi ashi.

New York police-i Palestine pusema longkak aiterem apu

New York, Monupii/May 19 (Agencies): United States nung Gaza nung rara anema ola adokba remsemtsütsü meranga aruba nung Honibarnü New York kübok Brooklyn nung Palestine pusema longkak aiterem police temi züka merenshiba den aika puogo.

Longkak aiterem Honibarnü southwest Brooklyn kübok Bay Ridge tesem nung adenshi. Iba tesem nung Muslim nungner aika alir kong Palestine aser Yemeni nungi jakzükertem aika densema lir.

Nakba anogo bilemteta yimjung nung longkak aitba ya police temi nüka lir ghonda ishika agi, aser iba mapang police temi iba sentong ya nokdangtsü meranga liasü.

"Longkak aiteremi yimtung süa aotsü tenzüka sülen mapa tatsüka dang lir New York Police Department lenmang tezülen ka nungi aru aser nisung tem mashi mashi puden tenzüka," ta freelance journalist Katie Smith shiba iba tesem nung liasü

lai Al Jazeera dang ashi. "Parnok ali nung laodaksü aser police tem aikati pua liasü. Police tem yagi longkak aiterem dak züka liasü. Longkak aitba sentong ya yimjung nung dang agia liasü aser iba mapang nisung aika puogo," ta osangbener yagi ashi.

Smith-i ashiba agi, iba tesem nung alirtem aser talisa Bay Ridge tesem nung alirtem kanga mepelar, kechiyong Palestine nungner pusema küm aika longkak aita arur saka tang tashi nung police-i tashiyim amshia longkak aiterem azüokba kodanga ngudanga mali.

Local sources temi ashiba agi, Honibarnü longkak aiter noklang aika nungi nisung aika puogo. Iba tesem nung agiba video tem ajanga police temi longkak aiterem atsür aoba mapang nüburtemi parnok inyakyim anentsü khanga asaloktsüba aser police temi apurtem alener gari ka nung anir aoba nguogo. Gaza nung rara anentsü

khanga longkak aiterem noklang aika NYPD-i puogo, kong May ita tetenzüklen Columbia University campus meita aoba mapang apurtem densema lir.

Honibarnüsa, Yihuda nungner densema nisung noklang aikati Nakba anogo bilemteta Washington, DC nung longkak aitba sentong ayongzüka agiogo.

Russia-i anüng ajanga Kharkiv amak; nisung 5 asü

Kharkiv, Monupii/May 19 (Agencies): Russia-i Deobarnü Kharkiv amakba sülen nisung pongu tepset aser nisung 16 yiruja liasü, ta local kettangürtemi metetdaksü.

Kharkiv Mayor Ihor Terekhov-i, nisung asüba aser yiruba indang osang agüja liasü.

"Deobarnü Kharkiv tezülen bomb apokba ola tulu angashia liasü. Russia nungner indang missile ana agi recreation centre ka dak kongshi, kong nisung tem südoksünema kazütepa liasü. Iba tesem amakba sülen nisung pongu asü aser 16 yiruogo," ta pai Telegram messaging app ajanga metetdaksü.

Reuters osangbeneria recreation centre ka raksar aliba anguba indang metetdaksüba den tekümzükertemi ashiba agi, missile tesashi ka apok aser iba sülen minute 15-20 tsüngda ano ka poka liasü.

Deobarnü ya awatsüng anasa aliba resort ka maka liasü. Resort anasa alir arishi küm 69

tain Valentyna-i ashiba agi, iba lendong nung la kinungbo taküm samaogo.

Pa tzü nung kazüa liasü ta lai, tzüküm nung ki teraksa aser tasümantem tuyua ashi.

"Kinungbo, ki aser alima nung takaba rongsen ajak samaba ya kanga dang temulung shiranger. Parnok ya shiruru; parnok kechiba nisung tepsettsü nüngdaker," ta lai ayima ashi.

Hopta ishika tsüngda Kharkiv yimti aser iba yimti temeket nung aliba tesemtem Russia-i missile aser guided bombs amshia makdar.

"Iba tesem nung sepaitem maliasü. Deobar asünung iba tesem nung nüburtem, tanurtem aser mashisa aliba tetsürtem anisüngzüktsü atema adenshir liasü," ta police inspector Yaroslav Trofimko-i ashi.

Jongdak nung teyari agütsürtem tepsettsü mesüra yirutsütsü atema Russia-i tasa tamajung amshiba atema Ukraine-i parnok aija arudar.

Democratic Republic of Congo army-i coup asütsü merangaba nokdang

Kinshasa, Monupii/May 19 (Agencies): Democratic Republic of Congo indang armed forces-i, Deobarnü Congo nungner aser bendangertem senteper coup asütsü merangaba nokdangogo, ta DRC army otongdar-i sangdong ka ajanga metetdaksü.

"Sorkar coup asütsü merangaba defence aser security forces temi nokdangogo. Congo nungner aser bendangertem senteper coup asütsü meranga liasü. Lenirtem densema item bendangertem aser Congo nungertem inyaksangshi nokdangogo," ta otongdar Sylvain Ekenge-i ashi.

Ajisüaka pai, item nisungtem ya tepset asü pua ayu iba indang osang tejangja magütsü.

Tir Felix Tshisekedi otongdar Tina Salama-i, Reuters dang Deobar anepdang presidential palace amak, saka army-i tensa azüokogo, ta ashi.

Kasa mapang nung Vital Kamerhe, shiba speaker akümtsü imlar, par ki amakba mapang tanüker ana aser iba ki amaker ka süogo, ta Kamerhe

indang otongdar aser Japan indang ambassador-i X ajanga metetdaksü.

United States embassy-i Deobar anepdang tekümaktsü metetdaksü aser iba tesem nung prangbong akhaba indang metetdakja liasü.

United States nung amenoker aliba yimden yimsüsür Christian Malanga indang asütsü ta bilemba Facebook page ka nung live-streamed video ka post sütsü aser pai anir item tesemtem amak asütsü ta amanger.

"Onok militants tem belemogo. Tshisekedi aser Kamerhe na atsüngtoktsüla, tenati iba linük nung tamaji mapa aika inyakogo," ta pai Lingala nung ashiba video nung mangaoka liasü.

Tshisekedi ya December ita tanabenbuba tir asütsü shima liasü, ajisüaka Ato Kilonser shimba sülen hopta trokbuba nunga sorkar mekümteti lir.

Kamerhe ya parliament nung speaker mapa atema candidate ka lir. Iba mapa atema election Honibarnü agitsü liasü saka Tshisekedi-i thinentüsü.



Georgia tir Salome Zourabichvili-i la tashi amshia foreign influence bill veto süogo. Iba bill ya "fundamentally Russia" ta jatsüa Georgia tir-i tatemangbuba temelaba agütsütsü memulung aser parliament dang European Union nung adentsü atema linük tejangraba aliba den putepa inyaksangshitsü mepeshi. Lai social media sabang X ajanga Georgian Dream Party-i agizükba bill ya lai veto asüba sangdonga liasü.

World Para Athletics: Nishad aser Preethi nati medal angu



Monupii/May 19, 2024 (Agencies): World Para Athletics Championships nung Deobarnü high jumper Nishad Kumar aser 200m asemteper Preethi Pal nati silver aser bronze medal nguogo. Kumar ya Tokyo Paralympics silver medalist lir aser pai tebur T47 high jump final nung 1.99m alemteta tanabuba jenjang nung tembang, aser iba tetoktepba tenzüker tasembuba anogo India atema mezüngbuba medal ngua liasü. Iba asaya nung America nunger asayar Roderick Townsend-i (2.05m) gold medal

ngua liasü. Kasa asaya nung India nungersa Ram Pal trokbuba nung tembang liasü. Pai 1.90 meter jokteta liasü. Kumar-i 2023 küm Paris nung World Para Athletics Championships asayaba mapang kasa asaya nung silver medal ngua liasü. T47 classification ya tekatsüla mesüra tekanük nungi shir alangtoker mesüra lemtar aliba para track athletes tem atema lir. Kasa asayamung nungsa Preethi Pal-i tetsür T35 200m final nung alizüing 30.49 seconds nung tongteta bronze

medal ka ngua liasü. Asayartem shirnok co-ordination impairments lir parnok T35 category nung tokteper. Maneni Deepthi Jeevanji, tetsür T20 400m final atema qualify süogo. Lai heat race nung alizüing 56.18 seconds nung tongteta qualify asü, koba Asian record ka asütsü. T20 category ya intellectual impairment aliba asayartem atema lir. Tang tashi nung China-i medal 26 ngua parnok temaba jenjang nung lir. India team tang 29buba nung lir. Iba asayamung ya May 25 nü tashi asayatsü.

Chennaiyin FC-i Jiteshwor den tenangzüktepba yanglushi

Monupii/May 19, 2024 (Agencies): Chennaiyin FC-i Deobarnü sangdong ka ajanga midfielder Yumkhaibam Jiteshwor Singh den 2025 küm tashi tenangzüktepba yanglushiba metetdaksüogo. Tawa tembangba Indian Super League season nung kanga junga asayaba sülen Singh den tenangzüktepba yanglushiogo. Manipur nungi arishi küm 22 tain midfielder, shiba 2022 küm Chennaiyin FC nung mezüngbuba ISL asaya liasü, pa ya tawa tembangba league nung club atema kanga tongtibang asayar ka liasü. Jiteshwor-i kanga takok ngua tackle 25 asü, koba season ka nung Chennaiyin asayartem rongnungi timba lir aser iba den interceptions 14 tashi süa liasü aser iba ajanga pa asayaba jenjang sayur. Kasa mapang nung head coach Owen Coyle-i Jiteshwor dak tamang akaba lemsatepogo.

"Jitu kechaia aotsü maliasü. Pa asayaba yimya ya India nung midfielder tem rongnungi khenyongi balaka aser taruba season club sentong nung pai tongtibang shilem agitsü lir," ta pai ashi. Jiteshwor-i Chennaiyin nungi tetoktepba ajak nung tang tashi nung 44 ben asayar lir, kong taoba season 23 ben asayaba densema lir. Paisa, club nungi maneni asayatsü maangka anguba atema pelaba lemsatepa liasü. "Chennaiyin FC nungi maneni asayatsü ya jangrademtsüka. Ni renloka aotsü atema aser coach tajungtiba kar aser asayartem nung angazüksü asoshi iba club ya tapet lir," ta pai ashi. 2022 nung Chennaiyin FC nung adenba sülen Jiteshwor ya club takok asoshi kanga tongtibang asayar ka kümogo. Pa taoba küm AFC U-23 Asian Cup Qualification nung shilem agiba India team nung züingoksema liasü.

Thailand Open 2024: Satwiksairaj-Chirag nati tarep asaya kokogo



Monupii/May 19, 2024 (Agencies): India nunger nüngtugu badminton tarep asayar Satwiksairaj Rankireddy aser Chirag Shetty nati Deobarnü Bangkok nung Thailand Open Super 500 badminton tournament tebur tarep asaya final nung China nunger tarep Chen Bo Yang aser Liu Yi na kokogo. Satwik aser Chirag nati iba asayamung nung kanga junga asayaogo aser tenati final nung Liu aser Chen na 21-15, 21-15 agi straight set nung koka liasü. March ita French Open Super 750 akokba sülen tenati taküm tang agi tanabuba asayamung kokogo. Maneni tena Malaysia Super 1000 aser India Super 750 nunga tanabuba jenjang nung tembang liasü. Satwik aser Chirag nati kanga dang tongtibang mapang ka nung iba asayamung

kokogo, kechiyong tena taoba asayamung ana nung junga masayateti liasü. India nunger tarep ya All England Championships nung tanabuba round nung tsükatok aser Satwik yiruba ajanga Asia Championships nung masayateti liasü. Thomas Cup nunga tenati junga masayatet aser asaya ka ana nung tera agi takok monguteti liasü. Satwik aser Chirag nati taküm Thailand Open nung game ka nung danga tamakok mongui final atong aser iba asayamung akoktsü imla liasü. Kasa mapang nung Liu aser Chen nati asayar tajung kar kokteta final tonga liasü. Satwik aser Chirag nati asaya kanga junga tenzüker aser tena 5-1 agi tejakdang aküm ajisüaka Chen aser Liu nati meyiper point pezü angu. Point 7-7 ta aliba mapang tarep ana tsüingda 39-shot rally

ka asaya aser China nunger tarep yagi iba rally koka 10-7 agi tejakdang aküm. Ajisüaka mapang tatsüka dang lir point ano 10-10 aküm. Mapang tatsüka dang lir Satwik aser Chirag 14-11 agi tejakdang aküm aser iba sülen China nunger tarep nem ya point pezü dang ngudakja tenati asaya akok. Tanabuba set nung India nunger tarep yagi maneni tajungba asaya tena 8-3 agi tejakdang aküm aser interval tashi nung tena point pongu agi tejakdang liasü. 15-11 ta aliba mapang asaya mapang atsüzükba atema Satwik nem tekümdangtsü metetdaksü aser Chirag-i shuttle ka ana zükpetba sülen point 14-15 aküm. Ajisüaka iba sülen Satwik aser Chirag nati Chen aser Liu na nem point ka danga magütsüi asaya koka liasü.

Arunachal nunger Football asayar Dodum-i Golden Boot Award angu



Itanagar, Monupii/May 19 (Agencies): Arunachal Pradesh nungi lanur football asayar Omang Dodum-i Golden Boot Award nguogo. Dodum shiba Punjab FC nungi asaya liasü, pai Reliance Foundation Development League nung goal 14 idakja iba award ya ngua liasü. Dodum indang takok dak sendakba nung Arunachal Pradesh Chief Minister Pema Khandu-i pa nem tenüngsang agütsü aser ashiba agi, pa ya lanur asayartem atema

nükrangdong ka lir. X sabang ajanga Arunachal CM-i, "Reliance Foundation Development League nung goal 14 idakja Punjab FC atema Golden Boot Award ngutsüba atema Omang Dodum nem tenüngsang agütsür. Na lanur football asayartem atema nükrangdong ka lir. Na maneni takok tajung nguyonga aotsü asoshi imlaja atar," ta CM-i ashi. Reliance Foundation Development League (RFDL) 2024 ya Punjab FC-i koka liasü.

BILEMDANGANG
"Merangdangba nung temaotsü lir."